

PAGPAPARAROM SA EVANGELIO

Rev. Fr. Philip Francis R. Bersabe

BANGKETE PARA SA MGA NASA LAYLAYAN KAN SOCIEDAD ASIN MGA TINAMPO

An mga evangelio winoptico nakacentro sa programa ni Jesus na ibalangibog an Kahadean nin Dios (*Basileia tou Theou*). An evangelio ni San Mateo nakacentro sa pagdara nin Marhay na Baretá sa magkahalong comunidad nin mga Hudiyo asin Griyego o mga Gentil na nagtubod ki Cristo asin naging mga Cristiano. Dai nawawara an tensyon sa duwang grupo kaya an parabola ipinanunungod sainda.

Enot, an Dios minahanda nin bangkete o fiesta para sa gabos. Sa enot na Babasahon hale ki Profeta Isaias, nilaladawan an Dios na galante sa pagpakakan nin masisiram na kakanon asin pagpa-inom nin mga managom na mga arak. Pinapamate niya an abundancia sa paagi nin bangkete. Pinapara niya an mga luha sa mga mata kan mga tawo sa bilog na kinaban. Ini an kaligtasan para sa gabos (*universal salvation*).

Sa icaduang Babasahon gikan sa Surat ni San Pablo sa mga taga Filipos, pinapa-abot man ni San Pablo na tood siya sa kadaihan asin abundancia, sa igwa asin sa mayo, sa kagutoman asin pagkabasog. Para sa iya, *God provides*. An Dios an nagtatao kan gabos na biyaya asin bendisyon hale sa saiyang pagkaherak asin pagkamatinao. Sabi ngani sa Salmo 23, "an Kagurangnan sakong Pastor, dai nin anuman na magkukulang sa sako."

Sa Evangelio gikan ki San Mateo 22:1-14, sa liwat ipinapaabot sato an ladawan nin Dios nin abundancia na naghahanda nin engrandeng banquet (*Royal banquet*), bako sanang engrandeng kakanan (Lk 14:15-24). An bangkete Royal, sa Griyego "ariston" bako sanang sarong aldaw o sarong karakanan, kundi nagkakapirang mga aldaw. Arog kita kaiyan ka padangat nin Dios, "siksik, liglig, at umaapaw."

A royal banquet with a twist. An mga enot na imbitado o mga huespe de honor nagharabo, nagsarayuma, bako lang yan, nangurolog, nang harass, nang insulto asin naggaradan pa kan mga surogon kaya labi an kaanggotan kan hade kaya pinadara kaini an mga kawal asin hukbo, winasak asin pinadusahan an mga paragadan asin sinulo an saindang ciudad. An scenario na ini minapagromdom sato kan nangyaring pag sakop asin pagwasak kan Templo sa Jerusalem kan Romanong General na si Tito kan taon 70 A.D. Hinihiling kan mga Cristiano na ini sarong kapadusahan sa mga Israelita na nagsayuma sa imbitasyon na akoon ang evangelio na dara ni JesuCristo, an pagsayuma sa Kahadean nin langit na dara kan Mesias na si Jesus.

An icaduang imbitasyon pinanunungod sa mga nasa laylayan o mga nasa kalsada (sa Griyegong tataramon diexodos). Pinaimbitaran kan hade an gabos na mga nasa kalsada, marhay man o maraot, mayong diskriminasyon. Gabos na yaon sa mga kalsada kabale na an mga nasa iskinita, gabos na mga etchapuera. Ini an imbitasyon para sa mga pagano, mga Griyego, mga Gentil, para sa gabos, para sa satuya. Iyo ini an twist, huli ta nagsayuma an piniling banwaan na Israel, nabenepeyohan kitang mga nasa laylayan, o mga nasa diexodos, mga kalsada (asin mga iskinita). Bako sana so mga maray asin mga banal, kundi si mga masombikal asin mga parakasala. Arog kita kaini ka padangat nin Mahal na Dios.

Panghuri, pag inapod kita nin Mahal na Dios sa saiyang engrandeng bangkete, igwa kita nin responsibilidad o katongdan na mag sul-ot kan gubing na akma sa pang kasal, idtong angay asin formal na bado, simbolo kan satong pagiging katood (*hetaire*) kan kinasal. Dai kita puedeng maging Gate crashers ta kun dai, papahaleon kita sa bangkete, itatapok kita sa luwas kun saen yaon an pagtangis asin pagragot kan mga ngipon. Papadusahan kita nin makuri kaya an mga imbitado, bako lang imbitado, kundi kaipuhan magkakanigo asin makapasa sa paghatol kan Dios. Ini an leccion kan parabola. Makukua sa pinakahuring verso, v. 14: "kadakul an mga inapod, alagad kaka dikit an mga napili... *Many are called but few are chosen.*"

GIYA SA PAGHOROP-HOROP

1. Inaako daw niato o sinasayumahan an imbitacion nin Mahal na Dios sa saiyang engrandeng bangkete, e.g. sa Banal na Eucaristia?
2. Nakasulot daw kita kan gubing na pang kasal bilang huespe de honor o naka ordinarióng bado sana asin napagkakamalang *gate crashers*?

RITO SA PAGPOON

Introduccion

C — "An Bangkete nin Kagurangnan."

An tema kan celebracion nin Eucaristia ngonian na Domingo iyo an pag-alok nin Kagurangnan sa bangkete nin pagkasararô, sa Eucaristia na kun saen an nagtutubod minacelebrar kan balaog nin kaligtasan na iwinaras nin Dios huli kan pagsakit, pagkagadan asin pagkabuhay-liwat ni Jesu Cristo. Igwa kan dai minasimbag sa pangapodan na akoon si Cristo sa Eucaristia. Igwa kan dai minaako sa presencia nin Dios, sa Kahadean na itinatao para sa kaligtasan kan kalag. Ipamibi niato na lugod padagos niatong akoon an pag-alok kan Kagurangnan na akoon siya nin may maninigong puso orog na sa Eucaristia.

Antifona sa Paglaog (S 129, 3-4)

(*Sinasambit kun mayo nin Awit sa Paglaog*)

Kun ika, Kagurangnan, magtandâ kan mga kasombikalan, Kagurangnan, siisay an matagal? Ta saimo yaon an kapatawadan, O Dios kan Israel.

Pataratara (*Tindog*)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapasaindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

(*Halipot na pagtoninong*)

Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod sato an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa daga katoninongan sa

mga tawong marahay an boot. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamat an mi ika huli kandakula mong kamurawayan, Kagurangnan na Dios, Hadeng langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpapara kan mga kasalan kan kinaban, kaheraki kami; ika na nagpapara kan mga kasalan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita. (*Halipot na pagtoninong*)

Kagurangnan, namimibi kami, danay na an saimong gracia mangenotan asin magsunod samo, asin padagos kaming gibohon na maorop sa mga gibong marahay. Huli ki Jesu Cristong Kagurangnan ni amo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA NIN TATARAMON

Enot na Babasahon

(Isaias 25,6-10) (*Tukaw*)

Nagpahayag si Profeta Isaias manonongod kan panahon nin kaogmahan, an panahon kan pagdatong nin Kagurangnan, an Paratubos.

Pagbasa sa Libro ni Profeta Isaias

Digdi sa bukid nin mga hukbô para sa gabos na katawohan, pinatakasi nin kakanon na manamit nin arak na managumon; pintakasi nin kakanon na mahutok, nin arak na malinigon. Asin digdi sa bukid na ini saiyang raraoton an takop na nakakatakop sa gabos na katawohan, an takop na nabibiklad sa ibabaw nin gabos na banwaan. An kagadanan saiyang mahalunon sagkod pa man, asin papahidon nin Dios na Kagurangnan an mga luha sa gabos na mga pisngi. An kabasogan nin saiyang banwaan hahaleon niya sa ibabaw nin daga, huli ta ini an sinabi nin Kagurangnan. Sa aldaw na idto sasabihon: “Ini an satong Dios; siya satuyang hinahalat, na iligtas niya kita. Ini an Kagurangnan, siya satuyang hinahalat. Ipag-ogma niato na kita saiyang ilinigtas. Huli ta an kamot nin Kagurangnan yaon sa ibabaw kan bukid na ini.”

An Tataramon nin Kagurangnan.

Gabos — Salamat sa Dios.

Salmo Responsorio

(Salmo 23,1-3. 3-4. 5. 6)

R — Ako mag-eerok sa harong nin Kagurangnan, sa gabos na aldaw nin sakong pagkabuhay.

1. An Kagurangnan sakong pastor, dai nin anoman na magkukulang sako. Presko asin berde an mga sabsaban: kapahingaloan itinatao niya sako duman. Dinadara niya ako harani sa tubig na malinaw: duman niya pinapakusog an sakong espiritu. (**R**)
2. Dinadara niya ako sa tanos na dalan; siya maimbod sa saiyang ngaran. Ako man maglakaw sa tahaw nin kadikloman, mayong maraot na sakong matatakotan, huli ta yaon ka duman: yaon an saimong bádas asin sugkod: an mga ini iyo an sakong kusog. (**R**)
3. Saimong inandang an bangkete para sako sa atubang nin sakuyang mga kalaban. Lana ilinahid mo sa sakuyang payo; an sakuyang kopa nagsusupay. (**R**)
4. Karahayan asin pagkaherak masunod sako sa gabos na aldaw nin sakong buhay. Sa harong nin Kagurangnan ako mag-eerok sa panahon na daing kasagkoran. (**R**)

Ikaduwang Babasahon

(Filipos 4, 12-14. 19-20)

Pinapasalamat ni San Pablo an mga nagtarabang saiyang kan yaon pa siya sa bilanggoan. An Dios nagtao saiyang nin kusog sa panahon nin kadificilan.

Pagbasa sa Surat ni San Pablo sa mga taga-Filipos

Tatao akong magpakadukha o magpakayaman. Ako pinatood sa gabos na bagay minsan saen, may laog an tulak, sa kadaihan o sa kaginawahayan. Gabos sakuyang makakaya na nagpakusog sa sako. Sa gabos kaini, marahay an ginibo nindo na makihiras kamo sa sakuyang kasakitan. An gabos nindong kaipuhan iwaras saindong nin sakuyang Dios, ki Cristo Jesus sa sukol na Dios sana an makatao. Pag-omawon an Dios na satuyang Ama, sa panahon na daing kasagkoran. Amen.

An Tataramon nin Kagurangnan.

Gabos — Salamat sa Dios.

Pagrokyaw (Efeso 1, 17-18) (*Tindog*)

(*Sinasambit kun dai inawit an Alleluia*)

Alleluia! Liwanagan niya lugod an mga mata nin saindong isip, tanganing mahiling nindo kun ano an paglaom na pinag-apodan saindong. Alleluia!

Evangelio

(Mateo 22, 1-14 o 22, 1-10)

An Evangelio minapaabot sa satuya kan kamawotan kan Dios na akoon niato an pag-alok niya na makisumaro sa bangkete na iyo man an pag-ako kan Kahadean nin Dios.

P — ✠ Pagbasa kan Evangelio na Sinurat ni San Mateo.

B — Kamurawayan saimo, Kagurangnan.

Giraray nagtaram si Jesus sa paagi nin mga parabola sa mga poon na padi asin sa mga gurang nin banwaan. Ini an saiyang sinabi: “An kahadean nin Dios kabain sa hade na nagpapakasal kan saiyang aking lalaki. Sinugo an mga surogoon tanganing paisihon an mga inalok sa kasal, alagad an mga ini habo na

makikinasal. Giraray nagsugo nin mga surogoon asin ipinasabi: “Andam na an bangkete, an baka binonô ko na, an gabos andam na. Madya kamo sa kasal.” Alagad dai pinaonrahan kan mga inalok. An sarô nagpasiring sa oma, an sarô sa negosio, mantang an mga sinugo dinakop kan ibang mga inalok, pinagkulgan asin ginadan. An hade naanggot. Sinubol an siyang hukbô, ipinagadan idtong mga paragadan asin ipinasulo an saindang banwaan. Dangan nagsabi sa mga surogoon: “Andam na an kasal, alagad an mga inalok dai maninigo kaya paduman kamo sa mga tinampo, asin alokon nindo an gabos na saindong mahiling.” Nagluwas an surogoon, nagduman sa mga tinampo asin tinipon an gabos na saindang nahiling, marahay asin maraot. An sala kan bangkete napanô nin mga bisita.

P — An Marahay na Baretan nin Kagurangnan.

B — Pag-omaw saimo Cristo.

Homilia (*Tukaw*)

Pagrokyaw kan Pagtubod (*Tindog*)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin daga, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bago kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saros a pagka-Dios sa Ama: huli saiyang nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(*Sa mga minasunod na tataramon, abot sa asin nanitawo, an gabos minaduko.*)

Asin nani-laman huli kan Espiritu Santo ki Virgen Maria, asin nanitawo. Ipinako pa sa cruz para sato kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat sosog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa saro, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Sa pagtubod, mamibi kita sa Ama na nagmamawot na an gabos na tawo mag-ako kan saiyang alok sa bangkete nin buhay na daing kasagkoran sa langit.

R — Kagurangnan, hinanyoga an samong pamibi.

1. Tanganing an Simbahan sa bilog na kinaban magdanay na tanda nin paglaom asin kusog para sa mga naglalakbay sa daga pasiring sa langit: mamibi kita sa Kagurangnan. (R)
2. Tanganing matalastas niato na an pagigin miembro kan Simbahan bakong garantiá nin kaligtasan kun dai kita magbâgo asin mabuhay sosog ki Cristo: mamibi kita sa Kagurangnan. (R)
3. Tanganing masimbagan niato an pagkamoot kan Dios sa padagos niatong pagsolsol asin paggibong karahayan sosog sa panugâ kan kita binonyagan: mamibi kita sa Kagurangnan. (R)
4. Tanganing an mga naghehelang asin mga biyadî makamate kan ranga ni Cristo sa mga gawe niatong marahay: mamibi kita sa Kagurangnan. (R)
5. Tanganing an mga paratubod na nagtalikod na sa buhay bendicionan asin biyayaan kan buhay na daing kasagkoran: mamibi kita sa Kagurangnan. (R)

P — O Dios samuyang Ama, pararoma an samuyang pagtubod tanganing mapakinabangan niamo an mga biyaya na aroaldaw minadatong samo. Tugote kaming makahiras sa saimong buhay. Huli ki Cristo samong Kagurangnan.

B — Amen.

LITURGIA NIN EUCARISTIA

Ofertorio (Tukaw)

(Kun dai inaawit an Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagkamatinao nag-ako kami nin tinapay, na idinodolot mi saimo bunga kan daga asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Dios sagkod pa man.

P — Inoomaw ka, Kagurangnan, Dios nin gabos na linalang, huli ta sa saimong pagkamatinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Dios sagkod pa man.

P — (Tindog) Magpamibi kamo, mga tugang: tanganing an sako asin an saindong atang maako man lugod kan Dios amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

Pamibi sa mga Dolot

P — Kagurangnan, akoa an mga pamibi kan mga paratubod na may mga dolot na sacrificio, tanganing, huli kaining mga gibo nin maimbod na pagpamibi, makaabot kami sa langitnon na kamurawayan. Huli ki Cristo samong Kagurangnan.

B — Amen.

Prefacio III sa mga Domingo kan Ordinariong Panahon

An pagligtas kan tawo sa paagi nin tawo

P — An Kagurangnan mapasaindo.

B — Asin sa saimong Espiritu.

P — litaas an mga puso.

B — Initaas mi na sa Kagurangnan.

P — Magpasalamat kita sa Kagurangnan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran:

Nakakagami-aw kami, na, sa daing suklong mong kamurawayan, nagsanggawad ka sa mga may kagadanan sa bagsik kan saimong pagka-dios; ata ngani itinagama mo an bulong sa samo man sanang pagka-magagadanon, asin kun ano an ikina-pahamak kan mga nawara iyo man an ilingtas mo sainda, Huli ki Cristo samong Kagurangnan.

Kaya an hukbô nin mga Angeles nagsasamba kan saimong kamahalan, nag-oogma sa atubang mo sagkod pa man. Nag-aarang kami na ipagboot mo na makasanong sainda an samong mga tingog sa kaogmahan nin mga magkairiba na nagsasabi:

Gabos — Banal, Banal, Banal an Kagurangnan Dios ni mga Hukbo. An langit asin daga pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (Luhod)

P — Misterio kan Pagtubod.

B — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimo Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (Tindog)

P — Natukduan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boot mo sa daga nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan

saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimo an kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog sosog sa saimong kabotan. Ika na nabubuhay asin naghahade sa kapanahonan kan mga panahon.

B — Amen

Pagpahayag kan Katoninongan

P — An katoninongan kan Kagurangnan danay na mapasaindo.

B — Asin sa saimong espiritu.

P — Magpatinaraohan kamo nin Katoninongan

Cordero

Gabos — Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: tawi kami nin katoninongan.

Pag-alok sa Pagcomunyon (Luhod)

P — Uya an Cordero kan Dios, uya an nagpapara kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion (1 Jn 3, 2)

(Sinambit kun mayong Awit sa Comunion)

Kan an Kagurangnan nagpahiling, kita magigin siring saiya, ta mahihiling ta kun siisay siya.

Pamibi Pakacomunion (Tindog)

P — Mamibi kita. (Halipot na pagtoninong)

Kagurangnan, mapakumbaba kaming nag-aarang sa saimong kadakulaan tanganing, siring na pinapabasog mo kami kan orog kabanal na Hawak asin Dugo, giboha man kaming makihiras sa buhay na diosnon. Huli ki Cristo samong Kagurangnan.

B — Amen.

Oratio Imperata (Luhod)

Gabos — Dios na samong Ama, minadulok kami saimo sa samong pangangaipo. Hinahagad mi saimo an pagligtas samo tumang sa pandemia kan Corona Virus na naglalakop ngonian asin nagdadara nin kagadanan.

Minahagad kami kan saimong tabang para sa mga tawong naghingowa sa pag-adal kan hinalean, kan hiro, asin paglakop kaining pandemia. Giyahan mo an mga kamot asin isip kan mga experto sa salud tangani na sinda man makatabang nin may maninigong kakayahan asin pagmakulog sa mga may helang.

Ipinapamibi man niamo an mga naglilingkod sa banwaan, sa gobyerno asin pribadong agencia, tangani na makahanap sinda nin bulong sa helang na dara kaining pandemia. Ipinapamibi mi man an mga tinamaan na kan helang. Sinda man lugod maumayan tulos. Tawan mo kami ni biyaya na maghingowa para sa karahayan kan gabos asin sa mga nagsasakit.

Ini hinahagad mi huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios sa kapanahonan kan mga panahon. Amen.

Divino Rostro, Kaheraki kami.

Nuestra Señora de Peñafrancia, Ipamibi mo kami.

(Angay man na hagadon an intercesion kan mga Patron kan parokya, simbahan, capilla, o barangay)

RITO SA PAGTATAPOS

Solemneng Bendicion (Tindog) Ordinariong Panahon III

P — An Kagurangnan mapasaindo.

B — Asin sa saimong espiritu.

P — Iduko an saindong mga payo asin mamibi para sa bendicion nin mahal na Dios. *(Halipot na pagtoninong)*

Bendicionan kamo nin Dios na makakamhan sa saiyang pagkaherak, asin danay nindong mamidbidan an saiyang nakakaligtas na katonongan.

B — Amen.

P — Pakusugon niya an saindong pagtubod sa mga patotoo kan saiyang pagkamoot, tanganing magdanay kamo sa mga maray na gibo.

B — Amen.

P — Antabayan niya kamo pasiring sa saiya, asin tabangan kamong magdanay sa pagkamoot asin katoninongan.

B — Amen.

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios!



GIYA SA PAGMISA SA SEMANA

Octobre 12, Lunes

Ika-XXVIII na Semana sa Ordinariong Panahon, Verde

Misa — Ika-XXVIII na Semana sa Ordinariong Panahon

Mga Babasahon — Gal 4:22-24. 26-27. 31. 5:1 | S 113:1-2. 3-4. 5. 6-7 | Lc 11:29-32

Octobre 13, Martes

Ika-XXVIII na Semana sa Ordinariong Panahon, Verde

Misa — Ika-XXVIII na Semana sa Ordinariong Panahon

Mga Babasahon — Gal 5:1-6 | S 119:41. 43. 44. 45. 47. 48 | Lc 11:37-41

Octobre 14, Miercoles

Ika-XXVIII na Semana sa Ordinariong Panahon, Verde

o Memorial ni San Calisto, Papa asin Martir, Pula

Misa — Ika-XXVIII na Semana sa Ordinariong Panahon o Comun nin mga Martires: I. Sa Luwas kan Panahon kan Pascua – B. Para sa sarong Martir

Mga Babasahon — Gal 5:18-25 | S 1:1-2. 3. 4. 6 | Lc 11:42-46

Octobre 15, Jueves

Santa Teresa kan Avila, Virgen asin Doctor kan Simbahan, Puti

Misa — Comun nin mga Virgenes: II. Para sa sarong Virgen o Comun nin mga Doctor nin Simbahan.

Mga Babasahon — Ef 1:1-10 | S 98:1. 2-3. 3-4. 5-6. | Lc 11:47-54

Octobre 16, Viernes

Ika-XXVIII na Semana sa Ordinariong Panahon, Verde

o Memorial ni San Hedwig, Religioso, Puti

o Memorial ni San Margarita Maria Alacoque, Virgen, Puti

Misa — Ika-XXVIII na Semana sa Ordinariong Panahon o Comun nin mga Santos asin Santas: II. Para sa mga Monje asin Religiosos – D. Para sa mga Religiosos o Comun nin mga Virgenes: II. Para sa sarong Virgen.

Mga Babasahon — Ef 1:11-14 | S 33:1-2. 4-5. 12-13 | Lc 12:1-7

Octobre 16, Sabado

San Ignacio kan Antioquia, Obispo asin Martir, Pula

Misa — Comun nin mga Martires: I. Sa Luwas kan Panahon kan Pascua – B. Para sa sarong Martir

Mga Babasahon — Ef 1:15-23 | S 8:2-3. 4-5. 6-7 | Lc 12:8-12



sambanwá

GIYA SA PAGESAMBA KAN BANWAAN NIN DIOS Ika-XXVIII Domingo kan Ordinariong Panahon • 11 Octubre 2020

MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis kan Caceres, sa pangengenot kan Caceres Commission on Communications, asin Commission on Liturgy. Ciudad nin Naga, Pilipinas • 2020